

per custodia di le porte; et hanno auto letere di la Signoria nostra se li mandi maistranze sono li per bisogno di l'arsenal, *tamen* le tenirano per tutta la settimana. Scriveno se li mandi danari, e se mai fu bisogno l'è al presente.

Noto. L'altro eri fo mandato a Padoa ducati 1000, a Trevixo ducati 800: il colateral zeneral stà a Trevixo perchè non vol star col capitano zeneral.

Di Trevixo e di Friul fonno letere. Nula da conto, *de occurrentiis*.

585
384 Fo parlato in Colegio zerca l'armar con li Cai di X, et lecti li partiti posti per alcuni che voleno andar sopracomito, e terminato far Consegio di X ozi per questo, *licet* fusse San Sebastian e non è solito farsi Consegio di X di festa, ma si chiama Pregadi e poi licentiat intra Consegio di X. *Tamen* fo terminato far Consegio di X per non esser molto gran festa, *licet* per la terra tutti vardasse per esser sora il morbo.

287 Da poi disnar adunca fo Consegio di X, et lecto 5 partiti posti per varii patrizi, quali voleno esser sopracomiti, e consultato la cossa, fu preso di acceptar uno partito posto per via di sier Zacaria Dolfin savio del Consegio, i quai fono questi: sier Vetur Diedo fo cataver qu. sier Baldissera, sier Gregorio Pizmano fo provedador a Citadela, qu. sier Marco, sier Zuan Contarini fo patron di galia, di sier Marco Antonio, et sier Nicolò Trivisan el XL zivil qu. sier Piero qu. sier Baldisera. Et fu presa la parte qui sottoscritta, et voleano balotar questi 4, *tamen* fu terminato indusiar aziò si veda quelli vorano acceptar tal partito, balotarli tutti.

La dizion di la parte presa è questa: Abino ducati 400 al mese a zorni 33 per mese, *videlicet* ducati 800 di contadi per il meter de banco; et armando galia bastarda, abino, più de li ducati 800 per rata dei homeni averano da poi auti, abino ducati 250 al mese de li danari de la masena a l'ufficio di le biave, principiando al partir loro di qui fino al ritorno, da esser seosi de mexe in mexe per li sui commessi. Non possino esser tenuti fuori dal mexe di Novembre 1514 in driedo; ma passato el ditto mexe, possino venir a disarmar senza altra licentia, nè se possi meter parte in contrario sotto pena di ducati.... quali siano di l'arsenal, et la parte non se intendi presa si la non averà certo numero di balote limitade. Al ritorno, quello li avanza per conto del suo servir, li sia dato la mità a l'ufficio di le biave de li danari soprascritti a ducati 50 al mexe per cadaun, et l'altra mità abino a spantar in tutte angarie si poste come quelle se ponesseno, si sue come di qua-

lunque persona. Le galie ge siano date palmate et fornite con le monition, artellarie et coriedi et non siano obligati ad angaria alcuna del et mancamento de diette, et coloro averano più balote, sia primo ad armar. *In reliquis autem*, justa la parte presa à di 14 et 18 del mexe presente, non contradicente a questa.

Ancora in dito Consegio di X fu assolto sier Stefano Celsi qu. sier . . . homo di anni . . . , qual è anni 25 per il Consegio di X bandito perchè, essendo XL criminal, reveloe certi secreti, et questo promisse donar a la Signoria ducati 100, et senza altro lezer el processo fu assolto, et la matina suseguente el dito vene in chiezia di San Marco, perchè el stava in questa tera, ma in caxa e non pareva a le mostre.

A di 21 la matina. La note nevegoe, e cussì 287* la matina e fo gran neve. Colegio si reduce, nula da conto.

Fo letere di Padoa. I nimici a l'usato, et par non esser mossi.

Vene in Colegio Carlo Corso, fo *alias* contestabele nostro, vien di Zenova con compagni zerca quali lui li ha menati, et verso Chioza essi fanti hanno patito naufragio, poco mancò non si anegassero, et nudi è scapolati. Bisogna darli sovenzion per vestirli et danari.

Partite in questa matina sier Hironimo da cà da Pexaro andato proveditor zeneral a Trevixo, poi ch'el Pregadi non ha voluto acceptar la sua scusa. È andato con abbondantia di neve per tera per il Teraio.

In questa matina il Colegio si reduce a veder le scritture dil caso di sier Zuan Batista Grimani qu. sier Hironimo, qual fu preso a li zorni passati in Quarantia di retenir per li avogadori di comun, per il caso incolpado di aver ferito sier Piero da Mosto Cao di sestier, di sier Francesco, per la qual ferita el morite, e si apresentò. Li deputati al Colegio sono sier Piero Marzello, sier Alvixe Sanudo consieri, sier Piero Contarini l'avogador di comun, sier Sebastian Michiel Cao di XL, sier Vetur Malipiero e sier Andrea Dandolo signori di note, et fo lecte le scritture, li testimoni e il suo costituito.

È da saper, a la Avogaria, è uno caxo che sier Nicolò Querini di Stampalia teniva zà più anni uno serigno ne la volta dil qu. sier Dardi Zustinian, nel qual era da ducati milia, et par ch'el non si trova: ha querelado contra sier Zuan Domenego Contarini qu. sier Julio che teniva le chiave di dita volta, et quello sarà noterò di soto: *unum est*, manca di danari.